

国朝耆献类征初编

國朝著獻類征初編

國朝耆獻類徵初編卷百四十目錄

郎署二

侯抒懷

王士祿

劉必顯

廖玉

王澧

孔允樾

羅爲賡

張吾瑾

何訥

丁澎

劉體仁

郭士璟

噶爾噶圖

王壘

王永命

李振藻

黃貞麟

周士儼

劉果

趙增

黃開運

李溥

葉封

廖聯翼

霍之琯

補錄

王士祿

丁澎

國朝耆獻類徵初編卷百四十

通奉大夫前署江西巡撫江西布政使司布政使湘陰李桓輯

郎署二

侯抒懔

公諱抒懔字爾謨姓侯氏別號古渠其先居晉始祖遷汴復遷襄遂爲襄城人數傳至邦奠生二子長抒憚有學行次卽公公性謙退仁愛能容物雖倉猝未嘗見疾言遽色嗜學刻苦一字一句必求心得不爲涉獵之習塾師田起龍先生嘗以偉器目之順治乙酉以鄉試副車選拔入成均戊子舉於順天壬辰成進士例授知縣公曰吾學未成恐不足父母斯民願得廣文一席稽典籍以資

經濟不逮具疏請因授河南府儒學教授公力倡二程之學多士蔚興人以比湖州歷八年繡衣使者兩上其事爲河南最一朝廷嘉之 賜絹一匹當內擢會有言進士教職必親民事始得升京職者當事者遂遷公爲山東濰縣知縣人皆爲公捥腕公獨曰數年所學正於此見濰富饒甲山左公治清苦不以一錢入私囊時匿旗下逃亡者謂之窩主法當流邑奸民多誣富室爲窩主每發輒破人產公廢寢食百計開釋民賴以安五年升戶部主事加一級 賜錦緞二匹以旌其廉 上方屬意公欲大用之而公竟卒時康熙庚戌也先是以外官入莅部署者皆以土物餽遺當事公獨無有人多銜之已而見其冬月衣舊綈臥無裊褥客邸蕭條有

貧士所不堪者乃其嗟嘆醵金市羊裘爲公禦寒計公事兄杼憚如父或督過婉容俯受人有犯者不與校過輒忘之尤重族黨其自晉來者公厚遇之一與居襄城者等

李來章曰憶公自洛遷維過里門余方垂髫往賀公公握手問所學意良厚周旋恂恂退讓不以長者自居易所謂謙謙君子公眞其人與予嘗嘆自學術不明士習澆薄往往以詖譖機械爲長平居矜傲桑梓多不能堪況一旦乘風雲而得志者乎如公厚德誠後進之楷模云

右傳李來章撰

侯公諱杼憐字爾謨號古渠河南襄城人始祖自晉遷汴自汴遷

襄城累傳至公父奠邦生二子公仲子也公少負至性孝弟愿謹
十二能文章比長湛深經術恥世儒空疏之學順治戊子登賢書
壬辰成進士故事進士謁選人例得大令公曰吾學未成不可父
母斯民子產云學而後入政未聞以政學者也具疏以請遂改河
南府教授洛自兵燹後學校廢矣公至闢講堂日與生徒發明二
程之旨穿穴經史旁接掌故以資吏事秩滿以卓異第一遷濰縣
知縣濰富饒稱劇邑公行次白浪河顧左右曰吾爲令當與此水
同其清矣治濰五年人服其廉時嚴匿逃之禁奸民多鉤黨以破
人產公立置之法大賈郭某陷於訟薦紳爲之請者以十數公閉
閣不與通及對簿事卒得白郭以千金餽峻拒之同年某爲萊州

守移書徵責公佯爲莫解復曰濫竽作吏曠職懷慚苟有可以報
朝廷愛百姓者教之敢不惟命守意沮思中傷公會巡撫劉公
芳躅特牘薦公擢戶部主事以去公之治濰也原本經術蓋自河
洛橫經皋比談道時已基之矣公質羸善疾入郎署轉劇踰年卒
公幼嗜讀書明季寇躪中原重以饑饉項鄧汝鄧之間千里無絃
誦聲公擁書如故家貧躬耕挂書牛角上且耕且讀人笑其迂獨
其師田公起龍奇之公成進士田與同榜云

論曰公幼孤受學於兄抒憚事之甚謹令濰日抒憚語公吾家世
清白若以一錢歸吾不復東視若矣故公以廉介特聞兄之教也
抒憚以學行爲經師晚年居柏泉山著採山效曾十三願諸書學

者稱爲柏泉先生戶部公以循吏顯柏泉以文學傳夷門監者之
後固多賢者哉

右傳田雯撰

王士禛

王士禛山東新城人刑部尙書士禛之兄順治九年進士清介有
守篤於友愛自少能文章工吟詠以詩法授諸弟咸有成就而士
禛遂以風雅爲海內宗仰始舉禮部投牒改官選萊州府教授尋
遷國子監助教擢吏部主事遷員外郎康熙二年充河南鄉試正
考官以磨勘里吏議逮下獄久之得雪免官時士禛方任揚州推
官兩親皆就養士禛因南遊往省遂移權杭州歷覽湖山之勝居
數年再起補吏部員外郎頗持正學士張貞生御史李棠先後建
言下吏議力直之人以爲難未幾又坐免母歿歸飲食不入口者
數日竟以毀卒年甫四十有八其爲文條鬯芊蔚絕去雕飾詩則

幽閒澹肆極乎性情之所之而一歸於正所著有讀史蒙拾然脂
集表餘堂詩存十笏山房辛甲上浮諸集

右 國史館本傳

子友王子西樵先生居母夫人喪以康熙癸丑七月二十二日疾
卒於家年四十八葬於某山之原季氏戶部郎中貽上士禎次其
行事屬碑而表之書凡五六至君諱士祿字子底濟南之新城人
雅好爲詩多記覽遇事成書有然脂集司勳集前後共若干卷爲
人清真簡遠望之脩然於父母兄弟之間至性獨絕其中子子其
外油油嘗抱膝不謁貴人士之後進布衣一言之善必爲之獎成
故天下慕義不名其官而稱之曰西樵先生始舉禮部簿吏事授

牒改官得教授萊州三年遷國子助教公卿奇其才擢吏部考功
主事明年遷稽勳員外郎典河南解試故事有司繩尺取熟輒穩
順不敢涉古文一字謂之中式君獨摘簡一變其卑弱又不以通
所司貴人人或惡之撫拾下吏具三木賴叔弟士祐殫力橐餽得
不死竟坐免官是時季氏推官揚州兩尊人就養君欣然南遊省
覲間移櫂西湖汗漫忘返既家食八年會上與天下更始朝議
還主司註誤者官君迫母命強起補考功員外郎而季氏復入爲
禮部遷戶部接邸聯騎文采照耀天下目之新城二王久之君坐
察議事奪三級未行而母訃至慟哭屢仆絕識者以死孝憂之竟
以毀卒君於詩獨愛孟襄陽嘗吟曰自從舉世矜高調誰識襄陽

孟浩然其於諸書綜擇折衷獨有義例嘗病廿一史冗駁乖舛三國志並列爲非謂宜廢陳氏而用謝陞季漢書倣晉書例列魏吳爲世家去宋齊梁陳魏北齊周七書而用李延壽南北二史其宋遼金用柯維騏宋史新編合之十二史旣正史體復省繁複擬上書不果又謂坊本子貢詩傳申公詩說並僞書李維楨序行津逮祕書收之皆誤也爲辨甚詳有功經學甚大在考功時議沈副使荃无妄得還秩張學士貞生李御史棠先後建言下吏議並力直之此數人者皆卓有聞於世者也其持清議多若此而年不稱德士大夫多爲流涕元配張氏再娶王氏二子曰啟演啟浣父與敕貢士 誥封禮部儀制司員外郎母孫 封宜人祖官浙江右布

政使象晉曾祖戶部左侍郎贈尙書之坦世爲明顯族君初不事浮屠拘幽時倣蘇長公齋戒寫佛氏書旣卒口體作異香經三日此蓋儒者所不道戶部以爲實錄云系之銘曰

瑯琊之裔世有名迹維公挺生舉體遐逸窟穴詩書萍蓬紱冕出則巨源退則中散有美壘簾更鳴遞嘯展矣達生疇云死孝有盡者年不朽者壽馭風泠然逝將誰偶

右墓碑施閏章撰

康熙十二年七月前吏部考功清吏司員外郎節孝王先生卒於家蓋以毀故也其毀奈何先是先生在京師聞母孫太宜人訃設位於堂晝夜擗踊投地絕而復蘇勺水溢米不入口者數日先生

素患羸親故或私憂之有曹君某者遺書以解先生先生曰不孝
當此大故越在千里凡先宜人附身之具俱不獲用其誠信況敢
言祿養乎不孝竊深悔之悔大則痛深今日之悲蓋有不及無過
也由是遂病既奔喪歸中夜哀號家人悉不忍聞枕席皆辨辨血
漬也病益革醫或謂心血盡耗矣惟豬肝可以補心先生拒之曰
吾甯守禮以斃勿越禮以生也蓋距太宜人小祥未二旬而歿遺
命朝夕奠惟設白粥清水舍酒脯家人從之親知哀先生之以孝
死私諡節孝先生享年四十有八禮曰節哀順變也君子念始之
者也若先生之循循守禮未始無節而顧抱羸疾以訖於歿雖謂
之不幸可也夫豈滅性者比與禮曰父母之喪仁者可以觀愛焉

知者可以觀理焉彊者可以觀志焉孝子悌弟貞婦皆可得而察焉然則先生之孝友仁知備見於此矣欲觀先生者舍此奚適哉先生諱士祿字子底自號西樵山人舉順治壬辰進士爲人清介有守自少以文章名尤工於詩晚歲益潛心六經其論僞詩傳有曰近世所傳子貢詩傳申公詩說皆僞也明有鄞人豐道生好撰僞書自言其家有魯詩世學一書傳自遠祖稷實自撰也又作詩傳託之子貢以爲張本而所謂世學者若相與發明蓋以世學之視傳猶毛傳鄭箋之視序示有本也尋有妄人依旁詩傳別撰詩說其體類小序其說與豐氏盡同惟篇次小異道生敘詩傳源流又詭其所從出云魏正始中虞喜奉詔摹石而宋王子韶開河得